

ԱՐԱ ԽԱԺԱԿԻ ԳՅՈՒԼՆԱԶԱՐՅԱՆ



2022թ նոյեմբերի 26-ին 76 տարեկանում կյանքից հեռացավ ՀՀ ԳԱԱ ՕԴՔ ԳՏԿ Օրգանական քիմիայի ինստիտուտի ազոտօրգանական միացությունների թ. 7 լաբորատորիա վարիչ, քիմիական գիտությունների դոկտոր Արա Խաժակի Գյուլնազարյանը։ Արա Գյուլնազարյանը անցել է բեղուն և հարուստ գիտական ճանապարհ։

Նա ծնվել է 1946 թ. հայ ականավոր գրող, մանկագիր Խաժակ Գյուլնազարյանի և բանասեր, աղբյուրագետ Հասմիկ Սահակյանի ընտանիքում։ Թեև մեծացել

էր բանասերների և գրողների միջավայրում, սակայն որպես կյանքի ուղի երիտասարդ Արան ընտրեց միանգամայն այլ բնագավառ։ 1964թ. ոսկե մեդալով ավարտելով դպրոցը ընդունվեց Նրևանի պետական համալսարանի քիմիական ֆակուլտետ, որն էլ գերազանցությամբ ավարտեց 1969թ.՝ աշխատանքի անցնելով ՀՍՍՀ Գիտությունների ակադեմիայի Օրգանական քիմիայի ինստիտուտում։ ՕՔԻ-ն նրա համար դարձավ երկրորդ տուն, վկան լինելով գիտական վերելքների, հաղթահարված դժվարությունների և մաքառումների։ Արա Գյուլնազարյանը 1974թ. պաշտպանել է «1,3-դիենների հենքի վրա ամինների և ամոնիումային միացությունների սինթեզը և դրանց փոխարկումները» թեմայով ատենախոսությունը ստանալով քիմիական գիտությունների թեկնածուի գիտական աստիճան։ 1995-ից մինչ 1999 թ. աշխատել է «ՆԱԻՐԻՏ» ԳԱՄ-ում։ 1997թ. Հաջողությամբ պաշտպանել է չհագեցած ամոնիումային միացությունների որոշ փոխարկումների բացահայտված օրինաչափություններին նվիրված ատենախոսությունը ստանալով քիմիական գիտությունների դոկտորի գիտական աստիճան։ Ա. Գյուլնազարյանի գիտական հետաքրքրությունների ոլորտը լայն էր և չէր սահմանափակվում

միայն ամինային միացություններով: Մեծ է նրա ներդրումը կենսաբանորեն ակտիվ միացությունների սինթեզի, մշակման և ուսումնասիրման գործում: Համագործակցելով Նովոսիբիրսկի բժշկական ինստիտուտի գիտնականների հետ հայտնաբերել և ուսումնասիրել է ամոնիումային աղերի հակավիրուսային հատկությունները: Ա. Գյուլնազարյանը ստացել էր հակավիրուսային հատկություններ ցուցաբերող ամոնիումային աղերին նվիրված մի շարք հեղինակային վկայագրեր: Արա Խաժակի Գյուլնազարյանը 1999-ից 2002թթ. եղել է ՕՔԻ գիտության գծով փոխտնօրեն, 2002-2003թթ. տնօրեն, 2008-2022թթ.՝ ՀՀ ԳԱԱ ՕԴՔ ԳՏԿ գիտքարտուղար: Շնորհիվ նրա կազմակերպչական եռանդի և բարձր մասնագիտական գիտելիքների կենտրոնի գիտական կյանքը սահուն էր և համակարգված: Ա. Խ. Գյուլնազարյանը եղել է նաև Հայաստանի քիմիական ամսագրի խմբագրական խորհրդի անդամ, 2009թ. ընտրվել է Ռուսաստանի բնական գիտությունների ակադեմիայի իսկական անդամ: Բազմիցս պարգևատրվել է Գիտությունների ակադեմիայի պատվոգրերով և շնորհակալագրերով: Ի լրումն այս ամենի, Արա Խաժակիչը, ինչպես սիրով դիմում էին նրան գործընկերներն ու նրան ճանաչողները, ուներ յուրօրինակ հիշողություն, լայն մտահորիզոն և գիտելիքներ քիմիայից զատ շատ ու շատ այլ ասպարեզներում: Օժտված լինելով մարդկային բարձր արժանիքներով իր լավատեսությամբ, ազնվությամբ, սկզբունքներով, բոլորին անշահախնդիր հասնելու ցանկությամբ նա վայելում էր գիտական հանրության սերը և հարգանքը: Այսպիսին նա կմնա իրեն ճանաչողների հիշողություններում:

**ՀՀ ԳԱԱ Օրգանական և դեղագործական քիմիայի ԳՏԿ
ՀՀ ԳԱԱ ՕԴՔ ԳՏԿ Օրգանական քիմիայի ինստիտուտ
«Հայաստանի քիմիական հանդես»-ի խմբագրական խորհուրդ**